

歷代  
軍兵  
志制



旗

軍

志

金德純 著

中華書局

叢書集成初編

歷代兵制（及其他一種）

中華書局出版發行

（北京王府井大街三十六號）

秦皇島市資料印刷廠印刷

一九九一年北京第一版

開本：七八七乘一〇九二毫米三十二分之一

統一書號：ISBN7-101-00894-1/K·367

旗軍志

此據學海類編本  
排印初編各叢書  
僅有此本

# 旗軍志

清 遼左金德純素公著

我國家自太祖武皇帝創業。以上聖起東垂。用兵威兼并。傍小國。及太宗文皇帝撫有全遼。臣服朝鮮。百度漸舉。爰立八旗。曰正黃、鑲黃、正白、鑲白、正紅、鑲紅、正藍、鑲藍。每旗析三部。以從龍部落及傍小國臣順者。子孫臣民爲滿洲。諸漠北引弓之民。景化內徙者。別爲蒙古。而以遼人。故明指揮使子孫。他中朝將衆來降及所掠得。別隸爲漢軍。各簡其部中賢才。用爲大將。將其衆。階正一品。曰都統。都統之下。副將二員。曰副都統。正二品。參領五員。正三品。隸于都統。副都統。佐領。正四品。驍騎校。正六品。每一佐領置一驍騎校。卒五十名。無常員。惟人數之多少而置焉。謂之馬軍營。滿洲、蒙古。又選馬軍精壯。便騎射者。爲一軍。置大將一員。正一品。位視都統。而稍貴。其選使統四旗。曰護軍都統。每旗復置大將一員。正二品。位視副都統。而稍貴。曰護軍統領。而統五護軍。參領正三品。護軍校尉正六品。亦因人卒之多少而置員。如佐領、驍騎校。統騎二十。而總號其軍。曰護軍營。更選護軍。尤技精力勇者。爲先鋒。每旗先鋒參領五員。正三品。將騎多少無恆數。亦隸于護軍都統。統領曰先鋒營。平時各統其軍。教以作坐進退。遇有事。則各帥其卒。執戈矛。爲王先驅。居則卒習其將。如左右手之于臂。將習大將。大將一指揮。可知諸將之才否。故無有庸劣之將。疲老之卒。有事征伐。事已而歸。還其卒于天子。大將不得私一人一卒。故無有驕悍不可制之大將。

其制上下維持最爲周密。後軍士立功者衆。諸官爵不足以充賞。爰置世職。準方武功爵以待破軍殺將。保城拓境者。初半階曰拖沙喇哈番。次正階曰拜他喇布勒哈番。次二。次三。次四。曰一等。二等。三等。阿達哈哈番。次五。次六。次七。曰阿思哈呢哈番。次八。次九。次十。精奇呢哈番。分等亦如之。上此則伯三等。侯三等。公三等。爲九階。共階十九。肅王國不與酬功。而公侯伯非出人意。亦不得擅請封。著爲制。凡選卒伍之法。一佐領壯丁二百名。以五尺之表度人。如表能勝騎射。充壯丁入籍。至六十而免籍。有甲卒缺出。即以充選。其餘爲餘丁。不任征伐。國有大役。卽以役之。及世祖章皇帝卽位。明綱失御。李自成覆京師。世祖提一旅自東垂龍驤虎躍。踏流寇于山海。入宅京師。臣一海內。其間他小醜據險稱戈。次第鏟削。芟夷天威所暨。無不如意。迨四海旣清。鑑往古太平旣久。兵驕而弱。不識金鼓之音。戰陣之法。命兵部尙書于春二月角射而賞。罰之前。期都統副都統率其屬及部卒習射于國郊。日一往。數日。兵部尙書臨視而第其上下。一卒步射十矢。馬射五矢。步射中的七。馬射中的三爲上等。賞以弓一矢十。白金布帛各七。步射中五。馬射中二爲中等。賞白金布帛各五。無弓矢。步射中三。馬射中一爲下等。無所賞。馬步射或一不中。或兩俱不中。則笞之一。佐領受笞之卒過十人。則佐領有不善教練之罰。至奪俸。一旗滿六百人。則都統副都統之罰亦如之。護軍先鋒營閱射。亦如馬軍之制。歲八月。教砲于拱極城。先期。八旗之將率其佐及步卒分二番。上番月初往。月中下番往代。至月終卒事。依山立十二營。每營一大將。一裨將。晨出至砲所。令每砲發三四出。勒兵爲方陣。進數十步。退爲長陣。首尾彌縫。結圓陣歸營。聚衆申令之。歸奏異事。至十月。

大閱甲冑軍器。八旗各列隊伍于各門外。大將及諸裨將皆被甲上馬。諸軍士嚴裝手矛立旗下。候兵部尙書閱其優劣。兵部尙書至。諸將馳馬迎數百步。前導至大將所。下馬升座。復呈弓矢刀劍。以次而閱。善則已。否則有問。卒事上奏。亦如閱砲。世祖于軍政。講之既精。教之有素。故所向無前。平時賞賜優飫。制產一壯丁予田三十畝。以其所入爲馬芻菽之費。一兵有三壯丁。將不下十壯丁。大將則壯丁數十。連田數頃。故八旗將佐。居家皆彈箏擊筑。衣文繡。策肥。日從賓客子弟飲。雖一卒之享。皆兼人之奉。又設官學。選八旗俊秀一佐領一人。學于其中。三年。比其藝而升進之。遇郎中員外郎主事缺。選于佐領世職習文藝達治體者充之。謂之保選。故順治間一時得人。八旗爲盛。煌煌乎皆幹國材也。今上卽位。承世祖之法。八年。逆藩吳三桂據雲南反。後耿精忠叛于福建。尙之信叛于廣州。與三桂連衡。上命將四出。次第削平。用都統趙璟議。以安不忘危。每歲秋冬。較獵于塞上。甲卒將佐。分番從駕較獵。暗寓營陣之法。後復允左僉都御史陳汝器請。增火器一營。每旗選馬軍精健者五人。拔二一佐領得二十人。置操縱尉二員。正五品。副尉二員。正六品。一旗置參領一員。正四品。統領一員。正三品。四旗置副都統四員。都統一員。卽命馬軍都統副都統兼任其事。平時月四五出練于郊。冬至。上親閱于天壽山。八旗軍爲三列。步居前。銃中列。左右翼以砲騎。鳴金。陣前移二十步。擊鼓。砲作。復鳴金。銃作。進數十步。陣開。騎從中出。策馬作窮追勢。數百步歸陣。如前鳴金。步卒進。如是者三。卒事。天子頒諸軍牢醴。三十四年。上用火器軍路厄魯得噶爾旦子厄魯倫河。三十五年。遂并馬軍歸于火器營。而諸營仍其舊焉。

論曰。從古軍政。大都善于始。墮于末。如周之卒乘。其始因民爲軍。征行不覺其擾。後東遷不振。敗于鄭。敗于戎。晉作五軍。非王朝之制。至戰國蕩然矣。漢南北軍強幹弱枝。武帝窮兵。召配天下閭里。宣威以後。反借用于四方。唐府兵其始與周制暗合。及天寶浸衰。賈人子皆竄身其中。安史亂後。漸失河北。此三朝者。其遠百餘年。近或數十年。卽浸失制作之意。況其始未善而繼之以怠乎。較三朝以論。春秋戰國之亂極矣。生民朝不保暮。然有抗命之諸侯。無匹夫特起之禍。周之制爲優。國家自太祖以來。至今垂百年。軍政日修。余從故老聞其始末。因著于篇。爲旗軍志。以備典籍之所未備焉。